



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 5742 vum honorabelen Deputéierte Fred Keup

Am Zesummenhang mam Sujet, deen den honorabelen Deputéierten a senger Fro opwerft, wëll ech nach eng Kéier ënnersträichen, datt d'politesch Bildung e wichtege Bestanddeel vun deem ass, wat d'Schoul eise jonke Leit ka matginn op hirem Wee zu mündege Bierger. Selbstverständlech muss dobäi d'Pluralitéit vun de politesche Stréimunge respektéiert ginn, grad ewéi de néidegen Equiliber an déi néideg Neutralitéit.

Nieft den Enseignanten, déi politesch Sujeten am Kader vun hire respektive Fächer wéi zum Beispill der Geschicht, dem Fach *Vie et société* oder der *Instruction civique* abordéieren, spillen och aner Acteuren eng Roll. Hei sief an éischer Linn, a fir dem honorabelen Deputéierten seng Fro ze beäntweren, de Jugendrot erwäänt, deen traditionell virun de Walen Table-rondë mat jonke Politiker vun alle Parteien organiséiert.

Walen	Schoulen	Vertruede Parteien
Legislativwalen 2013	Lycée de Garçons Esch/Alz. Lycée technique agricole Lycée technique de Bonnevoie Lycée Ermesinde Lycée Aline Mayrisch Luxemb. Lycée Joseph Bech Grevenm.	ADRenalin, CSJ, déi jonk Gréng, déi Lénk Jeunes, JDL, Jonk Piraten, Jonk Sozialisten, KPL Jeunesse, PID
Europawalen 2014	École européenne Mamer Atertlycée Lycée Joseph Bech Grevenm. Lycée Nic-Biever Lycée classique d'Echternach Lycée de Garçons Esch/Alz. Lycée Hubert Clement. Athénée de Luxembourg Lycée de Garçons Luxembourg	Et waren opgefuerdert deelzehuelen, all " <i>partis politiques (de préférence un jeune candidat de la liste électorale) qui ont présenté des listes aux élections nationales et européennes</i> ".
Gemengewalen 2017	Lycée Michel Lucius Lycée Bel-Val Lycée classique Diekirch	idem
Legislativwalen 2018	Lycée Bel-Val Lycée Michel Lucius Lycée Mathias Adam Lycée classique d'Echternach	ADRenalin, CSJ, déi jonk Gréng, déi Lénk Jeunes, JDL, Piraten,

	Lycée classique Diekirch Forum Geesseknäppchen Lycée Robert-Schuman Lycée du Nord Wiltz Lycée technique d'Ettelbruck Maacher Lycée	Jonk Sozialisten, KPL Jeunesse, déi Konservativ, Demokratie 2018
Europawalen 2019	Lycée Michel Rodange Lycée du Nord Wiltz Lycée Nic-Biever Schengenlyzeum École Ste. Anne/Lycée technique agricole	ADR, CSV, déi jonk Gréng, déi Konservativ, déi Lénk, DP, KPL, LSAP, Piraten, Volt Lëtzebuerg

Ech ginn dovun aus, datt dës Table-ronden de Prinzipie vu Pluralitéit, Equiliber an Neutralitéit entsprach hunn, déi ech méi uewe genannt hunn.

Ech wëll awer hei och d'Aarbecht vun engem aneren Acteur beliichten, deen an dësem Kontext eng ëmmer méi wichteg Roll spillt: den Zentrum fir politesch Bildung (ZpB).

Am Kontext vun de Walen huet den ZpB zesumme mat der Universitéit Lëtzebuerg d'Voting Advice Application (VAA) Smartwielen entwéckelt; dobäi gouf och dat entspriechend pedagogesch Begleetmaterial zur Verfügung gestallt. An der Applikatioun ginn all Parteien gläichberechtigt presentéiert.

Den Ament developpéiert den ZpB ee vergläichbaren Tool, deen ausserhalb vu Walzäiten eng Beschäftegung mat den Inhalter vu Parteiprogrammer an engem pedagogesche Kontext erméigleche soll. Och an deem Tool sollen all Parteien gläichberechtigt duergestallt ginn.

An der Publikatiounsrei *mateneen* vum ZpB wäert sech dat nächst Themenheft ë. a. mat der Interventioun vu politesche Parteien a Politiker am Schoulkontext beschäftegen, an de Schoulen och eng entspriechend Hëllef proposéieren; esou huet den ZpB schonn eng Formation continue ugebueden zum Thema "Politik gehéiert net an d'Schoul?", déi sech der Problematik unhëlt, wéi een eng Visitt vun Deputéierten an anere Politiker esou ka gestalten, datt déi uewe genannte Prinzipie vu politescher Pluralitéit, Equiliber an Neutralitéit respektéiert ginn.

Am Kader vum Projet "MengChamber" huet den ZpB zesumme mat der Chamber ee Projet an der Testphas, wou Schülerinnen a Schüler an der Chamber mat Deputéierte kënne fir en Austausch zesummekommen. All Parteien, déi an der Chamber vertruete sinn, hunn sech un deem Projet bedeelegt.

Lëtzebuerg, de 15. Mäerz 2022

De Minister fir Educatioun,
Kanner a Jugend

(s.) Claude MEISCH